

新刊權載之文集

權載之文集卷第十

唐權德輿字載之

雜詩

祇役江西路上以詩代書寄內

辛苦事行役風波倦晨暮搖搖結遐心靡靡卽長路別
來如昨日每見缺蟾兔潮信催客帆春光變江樹宦遊
豈云愜歸夢無復數愧非超曠姿循此踟促步笑言思
暇日規勸多遠度鶉服我久安荆釵君所慕伊子多昧
理初不涉世務適因臃腫材成此嬾慢趣一身常抱病
不復理章句胸中無町畦與物且多忤旣非大川濊則

守南山霧胡爲出處間徒使名利污羈孤望子祿孩穉
待我舖未能卽忘懷恨恨以此故終當稅鞵鞅豈待畢
婚娶如何久人寰俛仰學舉措衙茅去迢避水陸兩馳
驚晰晰窺曉星塗塗踐朝露靜聞田鶴起遠見沙鴉聚
怪石不易躋急湍那可泝漁商聞遠岸烟火明古渡下
碇夜已深上碇波不駐畏途信非一離念紛難具枕席
有餘清壺觴無與晤南方出蘭桂歸日自分付北窻留
琴書無乃委童孺春江足魚鴈彼此勤尺素早晚到中
閨怡然兩相顧

夜泊有懷

樓鳥向前林暝色生寒蕪孤舟去不息衆感非一途川
程方浩淼離思紛鬱紆轉枕睡未熟擁衾淚已濡窘然
風水上寢食疲朝晡心想洞房夜知君還向隅

自桐廬如蘭溪有寄

東南江路舊知名惆悵春深又獨行新婦山頭雲半斂
女兒灘上月初明風前蕩颺雙飛蝶花裏間關百轉鶯
滿目歸心何處說欹眠搔首不勝情

相思樹

家遠江東道身對江西春空見相思樹不見相思人

石楠樹

石楠紅葉透簾春憶得粧成下錦茵
試折一枝含萬恨
分明說向夢中人

斗子灘

斗子灘頭夜已深
月華偏照此時心
春江風水連天濶
歸夢悠揚何處尋

黃蘗館

駟車振楫越山川
候曉通宵冒烟雨
青楓浦上魂已銷
黃蘗館前心自苦

清明日次弋陽

自歎清明在遠鄉
桐花覆水葛溪長
家人定是持新火

點作孤燈照洞房

中書夜直寄贈

通籍在金闈懷君百慮迷迢迢五夜永脉脉兩心齊步
屐疲青瑣開緘倦紫泥不堪風雨夜轉枕憶鴻妻

病中寓直代書題寄

愚夫何所任多病感君深自謂青春壯寧知白髮侵癡
興勞善祝踈懶愧良箴寂寞聞宮漏那堪直夜心

端午日禮部宿齋有衣服綵結之貺以詩還荅
良辰當五日偕老祝千年綵縷同心麗輕裙映體鮮寂
寥齋畫省欵曲擘香牋更想傳觴處孫孩遍目前

酬九日

重九共遊娛秋光景氣殊他時頭似雪還對插茱萸

和九日從楊氏姊遊

秋光風露天令節慶初筵易象家人吉闈門女士賢招
邀菊酒會屬和柳花篇今日同心賞全勝落帽年

上巳日貢院考雜文不遂赴九華觀被襖之會

以二絕句申贈

三日韶光處處新九華仙洞七香輪老夫留滯何由往

珉玉相和正遶身

時以沽美玉爲詩題

襖飲尋春興有餘深情婉婉見雙魚同心齊體如身到

臨水煩君便被除

和九華觀見懷貢院八韻

上已好風景，仙家足芳菲。地殊蘭亭會，人似山陰歸。丹
竈珠綴掩白雲，巖逕微真官集。女士虛室舍春輝，拘限
心杳杳歡言望，依依滯茲文墨職。坐與琴觴違麗曲，滌
煩慮幽緘發清機。支頤一吟想恨不雙翮飛。

桃源篇

小年嘗讀桃源記，忽覩良工施繪事。巖逕初欣繚繞通，
溪風轉覺芬芳異。一路鮮雲雜彩霞，漁舟遠遠逐桃花。
漸入空濛迷鳥道，寧知掩映有人家。脰眉秀骨爭迎客，

鑿井耕田人世隔不知漢代有衣冠猶說秦家變阡陌
石髓雲英甘且香仙翁留餘出青囊相逢自是松喬侶
良會應殊劉阮郎內子閑吟倚瑤瑟翫此沉沉銷永日
忽聞麗曲金玉聲便使老夫思閣筆

新月與兒女夜坐聽琴舉酒

泥泥露凝葉騷騷風入林以茲皓月圓不厭良夜深列
坐屏輕箑放懷絃素琴兒女各冠笄孫孩遠衣襟乃知
大隱趣宛若滄洲心方結偕老期豈憚華髮侵笑語向
蘭室風流傳玉音愧君袖中字價重雙南金

七夕

今夕雲駟渡鵲橋應非脉脉與迢迢家人競喜開粧鏡
月下穿鍼拜九霄

縣君赴興慶宮朝賀載之奉行冊禮因書卽事
合巹交歡二十年今朝比翼共朝天風傳漏刻香車度
日照旌旗綵仗鮮顧我華簪鳴玉珮看君盛服耀金鈿
相期借老宜家處鶴髮魚軒更可憐

元和元年蒙恩封成紀縣伯時室中封安喜縣
君感慶兼懷聊申賀贈

啟土封成紀宜家縣安喜同欣并賦開共受閨門祉珩
璜聯采組琴瑟諧宮徵更待懸車時與君歡暮齒

河南崔尹卽安喜從兄宜于室家四十餘歲一
昨寓書病傳永寫告身旣枉善祝因成絕句
五色金光鸞鳳飛三川墨妙巧相輝尊崇善祝今如此
共待會元捧翟衣

奉使豐陵職司鹵簿通宵涉路因寄內

綵仗列森森行宮夜漏深
爰鏹方啟路鉦鼓正交音
曙月思蘭室前山辯穀林
家人念行役應見此時心

酬南園新亭宴會璩新第慰慶之作時任賓客
南亭烟景濃平視中南峯
官閑似休沐盡室來相從
日抱漢陰甕或成胡蝶夢
樹老欲連雲竹深疑入洞
歡言

交羽觴列坐儼成行歌吟不能去待此明月光好逮蘊
明識內顧多慚色不厭梁鴻貧常譏伯宗直子壻信時
英諫垣金玉聲男兒纔弱冠射策幸成名偃放斯自足
翛然去營欲散木固無堪虛舟常任觸大隱本吾心喜
君流好音相期懸車處此地卽中林

七夕見與諸孫題乞巧文

外孫爭乞巧內子共題文隱映花匳對參差綺席分鵲
橋臨片月河鼓掩輕雲羨此嬰兒輩歡呼徹曙聞

太常寺宿齋有寄

轉枕排燈候曉雞想君應嘆太常妻長年多病偏相憶

不遣歸時醉似泥

朝迴閣樂寄絕句

子城風暖百花初樓上龜茲引導車曲罷卿卿理騶馭
細君相望意何如

中書宿齋有寄

銅壺漏滴斗闌干泛灑金波照露盤遙想洞房眠正熟
不堪深夜鳳池寒

中書送勅賜齋饌戲酬

常日每齊眉今朝共解頤遙知太官膳應與衆雛嬉
勅賜長壽酒因口號以贈

恩霑長壽酒歸遺同心人滿酌共君醉一杯千萬春

冬至日宿齋時郡君南內朝謁因寄

清齋獨向圓丘拜盛服想君與慶朝明日一陽生百福
不辭相望阻寒宵

發峽石路上却寄內

莎柵東行五谷深千峯萬壑雨沉沉細君幾日路經此
應見悲翁想望心

貞元七年蒙恩除太常博士自江東來朝時與
郡君同行西岳廟停車祝謁元和八年拜東
都留守途次祠下追計前事已二十三年于

茲矣時郡君以疾恙續發因代書却寄

憶昔辛未歲詔書下江壩盡室赴禮官脂車雜輜軒行

役過梁苑淹留經圃田

郡君表姊婿元俯爲宣武從事
權理宋州郡君從婿李融時爲

鄭州各淹留

秦關信百二征駕逾三于仙掌眺蓮華靈祠

謁金天騶馭儼已駐女巫爭來前動容旣紛若展敬方

肅然

時爲女竺所尊過於恭敬不能具舉

蹇步入國門華簪拱祥烟諫曹

迨居守倏已十六遷及茲東乘轅二十餘三年盛明受

恩澤清近皆聯翩忽常禮寺重俄忝相印懸陳力才不

任乞骸詞頗堅解龜罷金鼎賜劍猶龍泉鄙夫何所能

實賴中饋賢談笑皆體遠箴規諒才全拜恩理晨裝詔

使來駢關風生鞍馬疾日出旌旗鮮信宿愿道途冀遊

記周旋暫別亦不易沉痾今未痊醫方驗桐君道術依

竺乾庶憑神明佑得使疾恙蠲

醫工輔氏漢於藥術診切大比丘片俊學持念

精至並約同來累路將護

永懷心如快引望脰已疴離披夏雲盡皎

鏡秋月圓開緘飄色絲撰日馳平肩延企勞夢寐涕洟

暗潺潑想君路經茲還復中祝延攝拜奠清醑相期保

華顛遠慙周君較聊疑顧彥先慇懃俟來報淚墨書此

篇

權載之文集卷第十

權載之文集卷第十一

唐權德輿字載之

碑

大唐銀青光祿大夫檢校司徒同中書門下平
章事太清宮及度支諸道鹽鐵轉運等使崇
文館大學士上柱國岐國公杜公淮南遺愛

碑銘 并序

通天下之志者在大君元臣之感會而已成天下之務
者在知人安人之教化而已孝文御寓貞元十九年統
燭羣生德侔往初建用皇極澤流方國淮南節度觀察

使左僕射相國杜公政成入覲迺三月壬子朔登拜司空秉鈞居中間一歲上皇承末命越八月皇帝受命神器弼亮三聖謨明九功當冢宰摠已之任護崇陵因山之制盡董經費以頒地貢乃作司徒式和人則進封岐土命賜備厚均齊天下之政茂遂萬物之宜尊道宏化匪躬宣力中外之重必歸於公初公之入輔也制詔副節度使兵部尚書王公爲左僕射代居師帥州壤鄉部鰥孤幼艾蒙公之化也久感公之惠也深鬱陶詠嘆願刻金石王公累章上請公輒牢讓中止至是復以邦人不可奪之誠達於聰明且用季孫行父請史克故事故

德輿得類其話言而鋪其馨香云公字君卿京兆杜陵人不書名尊大臣也清明廉直溫毅宏重易簡之道本於健順忠智之謀發爲事業慮善以動得時大行其初筮仕州府交辟韋尚書元甫實爲已知始自掾吏累爲命介盈庭鬪辨積歲疑留者片言以聽斷舍寃自誣具獄訟殺者覆視而全活江介吏師以爲神明由殿中侍御史轉主客員外郎工部郎中再爲撫州刺史以御史中丞領容州刺史經畧使入爲金部度支二郎中復兼中丞超拜戶部侍郎出爲蘇州刺史屬受代者以慶闕換饒州刺史明年以御史大夫領廣州刺史嶺南節度

觀察使徵爲尚書左丞復以御史大夫領陝州長史陝
虢都防禦觀察使歲在庚午以禮部尚書至於是邦禹
貢淮海之域職方東南之輿產金三品射利萬室控荆
衡以公泛通夷越之貨賄四會五達此爲咽喉初公之
至也歲丁驕陽人有菜色於是息浮費以悅之蠲雜征
以利之夫家之稅有冒役者免其罪以購之廢居之豪
有委積者盈其直以出之瀕海弃地焚芻填游一夫之
勤百畝可獲終古遺利沛然嘉生成於指顧得以蕃殖
先是營部未葺困倉未完介夫半寓於仁祠公聚或委
於支郡公乃慮材用量事期輯中權規大壯百堵皆作

三軍寧字轅門言言夏屋耽耽可以張射侯可以容宴
豆爰居爰處而武備脩矣巨廩崇構罩飛雲蠱縮以板
榦積如京坻得蓋藏之宜協出入之制多黍多稌而禮
節行矣連營三十二積穀五十萬工以悅使人以樂成
又瀦雷陂以溉稽地釀引新渠匯於河流皆省工費而
宏利澤俄授左揆竟叅大政加徐泗豪等州節度使先
皇帝在宥天下推恩彭城顧懷舊勞復命其嗣使得以
州師建節而公以二郡進律惟公鎮定一方心平德和
言仁必及人言智必及事生聚教訓勤身急病視闕境
如振闕之內撫編人有父母之愛因其習俗而均安之

識其慘舒而導利之仕六朝而推元老踰二紀而再掌
邦賦揚美化於方志流淑聲於命書其牧臨川也地叅
閩蠻人本輕情化被游手敏於農功堅舊防而時其蓄
泄當大旱而我有雲雨每歲徵令歸諸有司克變輸將
之勤不虧公上之入因獲贏利悉賙困窮其愆司計也
權重輕以平物力受比要以均財征厚生而不匱量入
而有節當一人注意之重盡三接沃心之言宰司沮傷
不得久處其鎮南海也服嶺阻深族類猜害塗巷陋陋
爍埃接連忿憶相因鬱攸斯作公乃脩伍列闢康莊禮
俗以阜火災自息南金象齒航海貿遷悍將反覆遠夷

愁擾吏困沓貪商久阻絕公乃導其善利推以信誠萬
船繼至百貨錯出邕部絕徼商人自擅誘掖招徠以威
以懷朱涯黎氏保險三代種落繁互數犯吏禁公麾偏
師一舉而平獷俗率化原人得職其登左轄也紀律脩
明清萬事之本其理分陝也惠綏浹治宏二南之化必
宿其業而脩其方崇庸大績其昭昭如是而又博極書
術詳觀古今謀王體斷國論其言有章聽者皆竦作爲
通典以究理道上下數千百年間損益討論而折中之
佐王之業盡在是矣公之先在漢則建平敬侯有立宣
之功在晉則當陽成侯夾平吳之策忠力雋賢寔明而

昌以至曾祖諱行敏皇銀青光祿大夫荆益二大都督
府長史南陽郡公王父諱慤尚書右司員外郎麗正殿
學士烈考諱希望歷鴻臚卿御史中丞再爲恒州刺史
代鄯二州都督西河郡太守襄陽縣男贈尚書左僕射
惟南陽德化茂于列藩惟右司文雅重於中臺惟僕射
有文武器任克揚風績其督鄯州忽節制留府數與虜
确奮其威謀奪鹽泉吞河曲城便地置新軍剖符惠人
理行第一以先大夫代德丕烈之若是公能聿脩而宏
大之憑厚貽慶爲不誣矣居鎮十三年願修覲謁拜章
十上西向涕淚上難其繼慰勉而已公以述職在於底

人納忠在於薦賢密疏請以王公爲代詔爲之貳暨公
之至也由大司寇爲大司馬以副軍戎裝伏謁和門禮
君遲命冠耀藩服介圭得請丹轂載馳勲籍禪校乞留
遮道初諭以溫顏終肅以軍法既告令尹之政卒獲子
牟之心詩曰布政優優百祿是道又曰神之聽之式穀
以汝則岐公永亨鮒莖如崗如陵不待瞽史而前知矣
惟王公師長論道如公之位阜俗撫封如公之心且以
斯人嚮慕三歲愈甚大懼公之功德竊而不章初撫人
廣人皆鑿堅石以摠盛烈及茲而追琢者三矣古所謂
信讓以泣百姓則人之報禮重其在是乎銘曰

惟天惠人惟辟奉天利建元侯于藩于宣文武杜公端
誠絜矩化治陝服聿來茲土開我烏鹵長我禾黍乃建
營部乃新廩庾成師足食比屋安堵里閭熙熙衍沃廩
廩十有三年慰安斯人雪泣抗章血誠上陳結戀明庭
不私其身樹善交代如公之仁考祥視履宜錫蕃祉寅
亮三朝是毗是倚密勿中樞矢其謀謬乃升司空亦作
司徒九賦旣平五教式敷中外之重惟公是圖彼都人
士飲公之德彼土樂康繁公之力永言介福祝我岐國
稽合聲詩于胥篆刻彼泉而實破石而泐公之德輝永
永無極

唐故義武軍節度使營田易定等州觀察處置
使開府儀同三司檢校司空同中書門下平
章事符陽郡王贈太師貞武張公遺愛碑銘
并序

維唐十一葉皇帝纂大統建大中始初清明敷佑下土
稽四征六服之理闕先正宗臣之籍流慶斯復遺風可
懷繇是博陵上谷列侯二千石元僚司武從事亞旅上
其故府太師貞武公功德請銘於碑以示厥後乃詔小
司徒臣德輿因地域之名物酌軍師之憲令舉而敘之
公諱孝忠字孝忠其先燕人八代祖奇北齊右北平太

守封右北平王齊季喪亂實開邊隙代有長技軼於外
區會王父靖乙失活部落節度使王父遜部落刺史父
謚早習先職來朝上京星環北極輸君長之贊幣賜變
南溟發邊關之導譯拜開府儀同三司他日以公之勤
累贈至戶部尚書公雄姿正志沉毅英達傳兵符於百
勝襲王爵於九代年未弱冠入侍明庭才爲異倫射必
命中以日磳之信愛受秦仲之車服自他有耀至是來
歸時立宗御天下四十餘載習文事而去武備人不知
戰恬於已然幽陵首禍殺洛怪駭公跡染汗俗心堅本
朝豈求生以害仁將蹈難以明義史籍繼亂猶居劫中

質其所恃無路自奮間道旁午密陳嘉猷俄而成德軍
節度李寶臣錫姓撫封同信臣之任就義若渴推心於
公綜其都軍以壯支郡乃策崇勲累居大官凡軍師之
禁令攻守之奇正成德之重必咨於公隣帥猖獗皇赫
問罪公出自上谷覘於貝丘寇徒六萬將犯中冀乘轅
外嚮方陣而前公以駟介千數馳馳急擊衆入其阻夾
攻其堅敵人力屈昏夜引去遷御史中丞封符陽郡王
尋拜易州刺史加太子賓客以軍之輯睦移於郡以郡
之班制叶於軍文理武毅交脩四暢師貞人蘇爲列郡
表儀初公與寶臣感槩於少年之場周旋於多難之際

迎導善氣切劘良規若驂有靳如熱斯濯異時自代前
定於公且曰與師之心勲力之冠也俄然寢疾瘖不能
言猶以手指北瞠然注目旣而惡子阻命陰交匪人因
喪以干紀專地而圖禍公驟諫不入飛章上陳請以州
兵首遏亂畧優詔拜工部尚書兼御史大夫恒州刺史
成德軍節度使一人注意四履專征糾合諸侯連收城
縣敗之於東鹿走之於常山以至斬首且無遺策轉兵
部尚書易州刺史易定滄等州節度觀察使賜軍號曰
義武時三分恒陽之地錄功有差而羣帥多心或懷觖
望太行而東疆場日駭且有從約皆爲假王公居其腹

心守正持重玉立於磷緇之際雞鳴於風雨之中靜柯
勁草在我而已彼朱滔者以燕昭公夸大煽結講張指
斥公乃出和門以蒞衆援曠日以誓公義利之間死生
不惑且曰縣官之所以賦車宿兵下尺一之詔者在排
難扞患而已吾徒之所以乘堅馭良佩丈二之組者在
畢力致命而已碎首塗地吾無悔焉一心事君四面受
敵俄屬京師急變鑿輅時巡時太師西平王以禁兵自
魏來援於我於是與公決策赴行在所公素約以伯仲
又申之婚姻分銳師選良將授以赴蹈使居顏行斷金
之契匪石不轉定山東爲己任坐制羣疑清轂下爲前

籌行戡大憝赤誠相照血涕交頤西平繇是建大勲立
大烈而公亦靜深以制動貞厲以伐謀使其從散約解
无亡矢遺鏃之費者公之功也前此拜尙書左僕射至
是同中書門下平章事貞元元年就加司空凡授律行
師十有一歲承寧諸侯滅黜不端動有節制人斯愛戴
贍助其供養賻補其禮喪拊循接禮勞徠安輯幅以正
德而不怵於邪濟以守忠而不回於利章灼卓異有初
有終其居涼國太夫人憂也手植松檟倚廬於墓感致
瑞祉詔旌其門終身之哀加人一等不遺故舊皆以器
使戲下多善吏庭中無留事雖古人之威懷無以過焉

春秋六十二以七年三月感疾薨於位德宗皇帝不視
朝三日冊贈太傅詔即吏弔祠禮賻有加其後累贈太
師易名貞武追封上谷郡王易之大有曰信以發志禮
之中庸曰誠之不可揜惟公推本於是闡然而彰德宇
宏大色容厲肅長才經武奇表出倫喬枝夏雲以直上
雄劍發匣而耀穎始以天寶十載受詔即戎授范陽郡
洪源府右果毅破九姓突厥收上黨郡漳源府折衝乾
元初轉左領軍衛翊府左郎將實鎮飛狐之地實應中
拜左武衛大將軍加金印紫綬歷左金吾大將軍兼太
僕卿殿中監以至於專席寶護剖符建牙載居六官乃

進左揆燮和鼎節平理水土真食大封異姓而王積功
伐以崇厚履信順而光大壯武之後遠繼公台富平之
門時推德器豈徒然哉嗣子今司徒同中書門下平章
事延德郡王茂昭以全才休績保大宣力戴翼天子撫
征諸侯嘗以工部尙書建旗博陵以刑部尙書循方伯
之職特詔所理郡爲大都督府歷左僕射司空亟居代
官南北軍衛爪牙上將同氣分職寵冒一時侯王則銀
黃相映子弟乃金埒對起流光貽訓其信矣乎二十年
延德王以介圭四牡來朝京師德宗沃心嘉歎宴喜蕃
錫如韓侯申伯故事順宗繼明崇德報功乃居台宰進

掌邦教教喻遐鎮涕洟就途今皇帝以道御天下燭明
理本間歲再入覲爲守臣龜龍乞留京師以奉朝請堅
若金石激於肺肝服勤王家丕赫宸睠感念勲節顧懷
義方直以鄭武公桓公漢韋平父子古先懿鑠舉集公
門二邦幼艾千夫長百夫長沐浴風烈怵惕慕思是儀
古式以永光耀斯不朽之事也拜君命之辱而傳信焉
銘曰

天乘日星亦有風霆君用文德亦資武力太師矯矯生
我王國時或艱屯師惟壯直大蹇朋來其心不回好謀
而成義路乃開博陵上谷地直枿木旣夷狡童則理長

較威謀抗厲命賜渥綈回回盜泉敷敷嘉玉凡我所履
與之豐福士皆賈餘人以仰足凋戈哀章裕此一方追
錫吊祠禮優職喪司徒襲慶道叶仁聖三朝戴君皆受
四命覲禮煌煌嘉猷洋洋湛露彤弓威儀有光甘棠蔽
芾邵伯所憩緇衣改爲鄭國之詩仍代洪烈邦人戴之
永言寘懷乃刻斯碑

權輿之文集卷第十一

權載之文集卷第十二

唐權德輿字載之

碑銘

大唐四鎮北庭行軍兼涇原等州節度支度營
田等使開府儀同三司檢校尚書右僕射使
持節涇州諸軍事涇州刺史兼御史大夫上
柱國南川郡王劉公紀功碑銘 并序

貞元十有八年秋九月皇帝以安定節制南川郡王昌
之休勳懿績與邦人臺老之咏嘆聲頌詔掌文之臣某
論次其詞以永金石臣拜稽首祇若休命於是考侯王

之表稽贊命之書採太常景鍾之義而繫辭曰惟元后
聰明齊聖以臨於下惟蓋臣厲翼莊誠以奉於上上下
咸懌協建皇極此南川所以感會神武發揚碩膚公疑
然持重爲國保障理溷人十五年政成事節師以律成
人以富教智若著蔡動如風霆內總端揆外崇長伯八
旒七章元袞赤舄有南仲方城之畧有充國劭農之績
君使臣臣事君發舒震耀事業光大其理然也公姓劉
氏彭城人少沉毅尙氣節得大易之師貞春秋之武經
肇自幼學揣摩感槩天寶末年未弱冠從河南節度使
張介然東討林胡以勞署湯州遂城府左果毅其後所

奉之府則李太尉光弼劉司徒元佐或盡護車賦率先
顏行是爲腹心節以金鼓軍之善政無不參焉師之右
職無不綜焉遷至開府儀同三司於列鄉爲大僕太常
於御史府爲中丞大夫歷太子詹事左散騎常侍工部
禮部二尚書異姓而王宜食其賦凡三益封至二百室
初拒史朝義也宗之郡將委以扞城賊鋒持久力屈引
去又皆留其戲下劇虜濟以利兵鈎援臨衝環城傳堞
公以淮海屏蔽實繫於斯血誠怒髮士氣旁厲周月堅
拒援師實來以愜愜之危走焚焚之狄始佐宣武軍也
任當委重往必投艱旣定彭城之急旋假濮陽之守主

忠信以任患難整偏師以立奇功奮其材謀多所剋獲
抗希烈而壁寧陵也以徒兵三千組甲五萬登陴搏戰
且逾四旬激衆扶傷竟申九拒於是救淮揚拔大梁或
倍道以赴晨歷其壘或鼓行而進終覆其巢於此二役
也擒翟暉虜鄭賁師不留行甲首山積然後窮追急擊
至於許昌渠魁窘困終以泯滅凡三與虜犇而河汴之
間乃平皆公之爲而元佐任公之効也故旬歲間累居
大僚貞元三年朝廷以五原盛秋式遏侵軼詔公領宣
武駟介北出護邊有逗撓犯令者立斬三百人以徇傳
按肅然威讐朔野俄拜本軍京西行營節度使雖拊循

行師未有分地而車服恩禮已如守臣明年遷四鎮北
庭行軍兼涇原等州節度使度支營田等使涇州刺史
是拜居秦之北地漢之回中俗修武備而尚氣敢自馬
司徒璘段太尉秀實之以威望德聲懷寧邊部其後則
禍拏師老疆場蕭然或依違選愼日闕而已昆夷游騎
時及我郭西門不啟南畝益蹙公曰兵以奇勝亦以嚴
終寇不可翫在吾穀中矣於是建長利規遠畧程日力
與人徒西城平涼開地二百里據彈箏峽之嶮北城保
定深入百餘里扞青石嶺之固凡七城二堡有堅甲利
刃制彼衝阨絕其驅侵公之封內燿燧滅息昔之旣脫

今有市列井樹之間犬雞相聞東諸侯勤王之師得以
寧宇而又因士之餘勇求地之遺利荷戈而戰擁耒而
耕出聞三捷之績居盡四支之敏闢彼墉堦麥禾蔽野
亦旣悅使而皆樂從十二年就加尙書右僕射武功旣
成教化旣明里閭有豐年亭郵有吉語其或四方之旅
謁急於公則耀威於長武納將於歸化皆稟睿畧而奏
成功十五年條軍市之租上獻天府數至十萬以贍東
師銳於爲國遠慮數言邊事蓄資力修賦輿思欲大舉
衝擊收功絕域之外豈徒使朝那陰密緩帶安枕而已
哉惟公瓌姿碩量備儻英偉文理武毅冠於羣倫雲蒸

風行交感至用志氣申而功業大寵嘉集而名器崇至
若勲身惠人勞俸安集遵守條職貫通典彙有行父事
君之心有考父益恭之德可以表率發於純誠宜其長
保富貴爲時元老昔尹吉甫美宣王任賢使能作江漢
烝民之詩惟聖人感人心以和平天下惟賢臣協聖謨
以鎮靜方國則皇帝之注意南川之陳力是信是使有
嚴有翼敷宜景化浹洽休德不然則被邊戴白之叟披
肺肝排闥闐而胡爲來哉敘武畧所以揚天聲美元侯
所以流王澤敢附雅頌式昭德音銘曰

天地健順三辰光潤君臣感通一德誠信皇明照燭保

合休運亮采有邦登昭傑雋帝曰爾昌碩勲洗洗爰自
偏師幹不庭方庶勝無前援陳下梁爾戰則克爾謀則
臧公拜休命藩宣賦政介圭賜馘撫是安定其猷克壯
上協仁聖沛然成功執德之柄乃峻壘垣壘垣崇崇乃
藝黍稷黍稷芃芃出有銳師入爲良農保就滋殖時公
之功武經輯矣文事亦理十有五年肅清邊鄙宜登介
祉永錫遐紀告類納忠以毗天子皤皤涇人俯僂上陳
肅肅王命命茲下臣采獲誠詞章明異倫鑠此貞石輝
光日新

大唐湖南都團練觀察處置等使朝散大夫檢

校左散騎常侍持節都督潭州諸軍事兼潭
州刺史御史中丞雲騎尉賜紫金魚袋李公

遺愛碑銘

并序

皇帝在有天下十九歲覆露元元東求官師六服羣辟
辯章教化歲九月制詔湖南長師中執法李公巽爲江
西申命小宗伯呂公謂爲之代於是循其功善跡其故
實百城之吏言於郡伍府之長歛於軍鄉部僑舊華顛
卍角一其音詞奔走理下請鏤金石以爲表式呂公以
公之馨香可覆視而不可誣也衆之咏嘆可論次而不
可遏也悉以列上實蒙可報乃類其言而文之云善爲

理者必因其俗而求所以便之因其便而思所以化之
惠澤被而五教行財用足而百志成上下熙熙臻於洽
平古之循吏公之報政皆是道也公字令叔趙郡贊皇
人曾祖知讓皇河南府長水主簿祖承允皇任朝散大
夫江州別駕考巖皇右武衛錄事參軍代名文行爲北
州冠族公始以典學舍章立於清朝詳平憲令閑練程
品秉直不回得時寤明能抗駁論輒還成命人之所難
於公爲易惟天愛人惟聖法天欲其善利逮下也故詳
試公以政事其初由殿中侍御史爲美源令由刑部員
外郎爲萬年令由左司郎中爲常州刺史邦圻和寧京

邑蕭清居部考課爲諸侯表率是皆章章已然之功也
貞元八年冬十二月由給事中至於是邦長沙九疑澤
國回遠徵令頗繁物力或屈歲杪逋負夫家病之人未
安於里落程不給於公上公乃嗇其經用代其賦輸厚
施已責過於萬數得以贍助使之均安又以支郡地征
有繁軍實量力調穀減輕緡錢經始致用爲之倉庾時
其發斂而歲無凶荒以封內饋饑道路風波轉漕汭泗
僦載煩苦僇功度木爲之舟楫程其遠邇而師以足食
以邑里湫隘之不宣也則闢其塗巷以利之以室廬苦
蓋之不固也則教其陶瓦以易之講功慮事以建長利

如此之備也稽先師之教以進儒術庠塾經明歲時計
借出入阡陌煥休農里無告則加其餼發聞則弛其征
鄉無不率教者修司馬之法以宏其事器用犀利賦輿
輯睦拊循以誠少長有禮事親者賜其供養被病者恤
以醫藥士無不買勇者精力賦政以之鎮靜如此之至也
唯公直而和肅而寬纘密而智溫良而能斷秉心砥平
涖事風生法制定於上奇衰絕於下故下車而安已日
而孚期月而政成五年而增秩六年而進律德風下偃
協氣旁達丕休乎哉前後與公交代於是邦者皆以密
侍右職來施美化裕茲一方其天意乎昔弱翁次公率

以郡國理行入當柄用然則三湘九江之地豈得顯受
公之賜耶太師陳詩觀風諸侯言時計功皆前志也暨
魯大夫請於周而史克有駟駟之什今潭人以德輿再
拜奉命書獲知懿績俾章善頌永篆樂石銘曰

帝命元侯允釐方州郁郁李公此焉輯柔洞庭南匯熊
湘經介下爲度制上以藩衛彤襜淑旂四牡有輝授茲
介圭輟自黃扉吏絕私回俗無尤違保惠教順樂郊焉
依乃倉乃庾克敏農穡乃剡乃剡利涉不息乃端徑術
乃導埏埴政成事時節費寬力七郡清靜百嘉蕃殖誠
以愛人滋於樹德今則去我隣邦是式祝公伊何上贊

皇極報公伊何惟金石刻載茲聲詩永慰南國

唐故光祿大夫檢校太尉兼中書令成都尹劍

南西川節度副大使知節度事并管内支度

營田觀察處置統押近界諸蠻西山八國雲

南安撫等使上柱國南郡王贈太師韋公先

廟碑銘

并序

萬物本乎天人本乎祖乃立宗廟以交神明德厚流光
追養繼孝順而下之曰義等而上之曰仁國家稽合禮
文損益前載崇功貴仕得祠四室於王制酌諸侯二昭
二穆之義於祭統見君子盡志盡物之誠惟太尉兼中

書令南康郡王懿文經武保合昌運左右德宗格於皇
天始恢隴坻之旅終化岷峨之俗貴爲上公位極元台
克肆忠力乃圖孝享作新廟於京師大安里古者揚其
功烈銘於祭器近古以魯鍾衛鼎追琢先德不若鑿文
字於麗牲之碑之爲詳也乃謹如書之云公姓韋氏京
兆杜陵人自扶陽重侯用經明至宰相後裔蕃昌德與
位偕積十六葉至公六代祖範字元禮以字行於代仕
周爲車騎大將軍入隋爲沂州刺史啟土郿城易名曰
莊實生孝恪雅有文憲武德初侍御史爲洛州別駕洛
州生司馬府君諱機爲第一室端誠正志休有厥聲專

對出疆艱貞復命著西征記以獻太宗嘉之剖符檀州
修起儒術二典卿曹陟降屯夷操持貴倖不避強禦繕
理官室得其時制史氏書之爲唐名臣以夫人隴西郡
君辛氏配司農生坊州府君諱餘慶爲第二室清和修
潔履道不回歷右騎衛兵曹參軍以至二千石以夫人
武功蘇氏配坊州生贈太子少保府君諱嶽子爲第三
室方嚴貞幹政事修明在母后時以直忤旨由太原令
移佐睢陽出入四朝績宣中外歷殿中監剖符八州廣
海湖統眉徐衛陝所至之邦有威有懷凡再造命以夫
人扶風郡夫人竇氏配少保生贈太子太保府君諱貫

爲第四室盛德循行含章自牧歷藍田尉淑聲流聞上
纂崇厚下貽風訓凡三追命以夫人涼國太夫人段氏
配噫嘻自扶陽至鄆城積丕烈於前史自考廟至顯考
廟流熾昌於後葉列於禘嘗儲厥義方故南康王苞五
常貞四教秉靈傑出舍道中立其初誓偏師建奇功扞
大患立大節以儒衣法冠授律鑿門佩亞相之印綬脩
元侯之節制就加宗工入堂金吾撫征全蜀命賜備厚
由地官轉天官叅總端右平章宰政進中書令加司徒
太尉鉞鉞拒鬯旂鑿琫戈有嚴有翼乃蔚乃赫忠厚博
大以阜俗信廉勇仁以成師南蠻納郕西羌解辨象胥

絳戎捷樂府陳夷歌守正持重推誠畢力開地通道者
九千餘里生聚教訓者二十一年天文紀功刻在金石
暨德宗弃天下太上居諒闇危言急病體國忘身毅然
君子之道卓爾大臣之節永貞元年秋七月考終命於
理所冊贈太師有司奏諡曰忠武公自廟成距今凡八
年矣公以天子守臣安危注意不得視滌濯承古獨而
元兄國子師業聿實奉朝請薦其常事孝友而才稱於
士林初公之仲兄曰暈屯田員外郎贈鄧州刺史叔氏
曰肇太子左庶子兼御史大夫贈左散騎常侍咸以器
望而延褒錫公之夫人贈魏國夫人張氏其祖禰與外

王父皆秉國鈞爲天下華腴嗣子工部員外郎行立銜
恤無怙齊喪中禮大凡四廟之支旁尊羣從喧赫昭融
不可勝書至若質明光近沐浴盛服虛中而理嘉薦匪
懈而無違心大飴沉齊馨薌滌絜旣思其志意若聞乎
容聲洞洞乎屬屬乎有以見舉十倫而備百順昔素王
云以戰則克以祭則受福其斯之謂乎司業悼手足之
凋落感春秋以悽愴永懷明發俾篆斯文銘曰

新廟有恤靜深奕奕孝孫匪解元衮赤烏洪闕章章乃
侯乃王漢稱扶揚唐有南康二十三葉沛然蕃昌四室
崇崇斯焉享嘗烈烈南康溫良能斷謀猷罇俎文武貞

幹汧岐之西履沴銷散井絡之下天文昭煥撫封全歸
冥漠德輝聿修孝享家法無違以昭以穆以似以續和
氣婉容苾芬烹熟子孫大小罔不祇肅神之聽之報以
介福

大唐金紫光祿大夫守司空同中書門下平章
事充太微官使上柱國燕國公于公先廟碑

銘并序

國朝之制二品以上祀四廟三公品第一雖有始封亦
不敢逾焉元和五年相國司空燕國公立新廟於京師
蘭陵里司空公以文武偉才肆勤納忠外貞師律入作

公相以平水土以調陰陽深惟祖禰尊尊之義昭穆親親之道乃圖廟食以永代德公姓于氏河南人七代祖謹後魏柱國大將軍周太傅三老燕國文公六代祖竇周大左輔隋贈司空燕國安公五代祖象賢隋驃騎大將軍禽昌定公惟三葉有大勳力於北朝乞言而爲傳史體國以書功令以至公四代祖益州郫縣令諱德威夫人京兆韋氏曾祖綿州顯武縣令諱互範夫人北海唐氏王父贈刑部尚書諱汪夫人北海王氏烈考贈司空諱夔夫人贈邠國太夫人京兆韋氏凡宗廟之數郫縣爲初室顯武爲二室尚書爲三室司空爲親室其配

各以夫人氏交神明之道也惟郟縣顯武遵道服儒廉
退潔修且曰邠曼容陳仲弓吾之師也故仕不過六百
石而以理効聞尚書湛冥善閉舍道特立以應士燕居
至於沒身凡三追命至大司寇先司空廣大而靜恭檢
而好禮合一雅修四教推明理古之學貶絕非聖之書
而恬智交養龜頤不惑起家益州東陽主簿四徙官至
寧州真寧縣令又再轉至泗州別駕祿至卑而仁及物
道未泰而志不懾公卿大夫之間尊有道而踈利權天
寶末宰府擅朝惡其剛介不附已故官止郟佐而慶延
身後朝典加恩亦三追命自密州刺史吏部尚書以至

于論道焉長子頗專良有行終洋州司戶參軍冢子頊
貞幹強敏程功賦職歷戶部侍郎以公事貶泉州司戶
贈楚州刺史幼子項吏理清明仕至長安縣尉司空卽
第三子也英明閎達剛方博厚才可以扞大患學可以
析羣疑彌綸中朝則尚書郎京邑廷尉皆有懿績惠綏
外服則湖蘇號陝二千石察廉克宣功化絲山南東道
節度使平章事入覲居中冊拜顯尊紹文公安公之爵
地展盡志盡物之誠敬悽愴休惕精明吉蠲詩曰春秋
匪懈享祀不忒司空當之矣又曰以委以侑以介景福
先公宜之矣公又狀先公之行其大畧曰孔宣父應聘

歷國困而老於洙泗我先君宦學於天寶之年而操之者甫忠

謂林甫國忠

先君能無窮乎又曰小子不敏不

通先君之大道不識先君之大行不肖之罪也凡類是者千餘言其太史公自敘之風可以論譏酌之祭器德與外王母公之從母也故其門中風訓獲周知之悉備重任在公下列公以廟銘見授頓伏上聞尊嚴咫尺實奉面命其在傳信不敢曼肆銘曰

燕文三老弼魏佐周安公定公亦播厥猷耶縣顯武一同丕矩尚書司空三命追崇義訓忠教公台輝耀乃封故地乃建新廟新廟是宜羶薌吉祠齊明盛服乃順乃

時卑靜以正如親聽命求福不回孝順以慶刻銘斯碑
以代烝彝

大唐浙江西道都團練觀察等使潤州刺史兼

御史大夫河南郡公薛公先廟碑銘

古諸侯五廟大夫三廟廟在其國聖朝以官品制室數
侯伯理外而廟在京師其或覲於明庭入爲孤卿則吉
謁懋信展敬受福居常則冢介子姓薦其常事優然肅
然追養繼孝之義重焉元和五年歲直庚寅浙江西道
都團練觀察使潤州刺史大夫河東郡公薛公萃建先
廟於長安縣永安里其祠三室初薛之先在殷爲左相

在周爲侯國至漢御史大夫庾德爲宣元名臣從廣德
十三葉至後魏安西將軍涪陵侯謹乃分五房又四葉
至隋禮部尚書道實道實生皇尚書議曹郎德儒德儒
生寶積濟齊潤三州刺史揚州大都督府長史寶積生
代州定襄道行軍司馬待詔公之曾也爲第一室夫人
京兆韋氏配焉司馬生衛王記室太子司議郎贈太常
少卿保公之祖也爲二室夫人范陽盧氏配焉太常生
京兆府奉先縣尉贈工部尚書順先公之禰也爲第三
室許國夫人吳氏繼夫人同郡裴氏配焉惟司馬以兵
鈐機畧恢武經邊備惟太常以端士雅文仕王國宮朝

以至先尚書舍道安早四命官而再結綬始仕巴西與
楊國忠爲寮比乃操柄銳於引重賦詩謝絕不肩就焉
獨用義方以振家法積厚餘慶河東公實承之公忠敏
廉直和恒簡惠爲政事吏師於文章爲聲詩所施在樂
易所至有風采京邑肅清虢人理平今皇帝收天下之
初推擇方任聯命爲湖南浙江東西三道長帥歷御史
中丞就加御史大夫凡三方二十郡皆據蕃善地人受
其賜班制規爲四封宜之乃剏廟貌以嚴祀事楹階俎
豆之飾儉而中節口稱盛薦之儀質以盡敬水草陸產
血毛幽全柔嘉滌濯怵惕悽愴思志意以如在交神明

而來格君子曰祀之忠也其若是乎初公之伯氏仲氏
曰萊曰莘許國夫人之出而代宗從母母弟也勞謙淑
均不自驕盈以功次奉朝請皆至贊善大夫以沒公之
母兄曰芳雅有器幹爲北都命介由御史府入爲秘書
丞亦不至大官抑代德鍾美朋三壽而享五福者其在
季乎昔魯以閔官受社衛以烝爨崇孝酌用古義揭於
茲碑其銘曰

宗廟祭祀禮之重事壘壘河東尊仁安義薛爲諸侯爵
列春秋在漢廣德亦居大夫厥後焜煌三祖五房如山
崇崇如水湯湯河東楨幹纂服周漢乃尊藩衛乃長邦

憲祠宇碩曼蒸嘗嘉薦求福不回降福孔偕入室出戶
周旋敬齋麗牲有碑乃琢乃鏤河東孝享永示厥後

權載之文集卷第十二